

Wantok Kamap 100 Taim



• *Pater Francis Mihalic*

Edita bilong WANTOK i save kisim planti pas i kam long ol rita.

Sampela i save autim ol kain wari bilong ol, na sampela i askim bai sampela senis i kamap long WANTOK olsem bai i gat nius bilong ol arapela kantri.

Sampela pas moa i askim bai Edita i autim sampela tingting bilong em long ol wari i kamap insait long Papua Nu Gini.

Yes, mipela i no lusim tingting long ol dispela askim bilong ol. Mipela i laik bai ol senis i kamap isi isi. Bai mipela i redi, bai ol dispela senis i ken kamap.

Yu laikim sampela senis moa, orait, salim pas i kam long: WANTOK Edita,
P.O. Box 396,
WEWAK. E.S.D.

Dispela em i namba wan handet taim mipela i bin prinim WANTOK niuspepa. Mipela ol memba bilong staf i amamas tru long dispela mak i kamap nau long mipela.

WANTOK niuspepa i bin stat long yia 1970. Pater Mihalic, papa bilong en, i wari olsem: Hia long Papua Nu Gini ol Kristen misin i save tromoim planti mani i go insait long ol wok edukesen.

Planti studen i pinisim praimer skul tasol, na bikpela lain gen i save lusim haiskul long Fom 2. Tru, ol i no inap ritim gut ol buk na niuspepa long tok Inglis.

WANTOK i wok long helpim ol dispela lain na ol nara-pela bikpela manmeri tu long ritim na raitim TOK PISIN. Nogut edukesen bilong ol i pundaun nating.

WANTOK i wok long givim ol

kain kain nius i laik kamap insait long PNG - bilong gavman, bisnis, na ol misin bai ol pipel i save gut long kantri bilong ol.

Nau mipela i stap long taim bilong planti senis. Kos bilong planti samting i laik hariap go antap. WANTOK tu i karim bikpela hevi long ol dispela senis - kos bilong baim pepa nating na bilong prinim na salim i go long ol distrik i ran i go antap na i no gat profit i kamap long WANTOK.

Mipela no laik prais bilong WANTOK i go antap. Yu ken helpim sapos yupela ol-geta i baim planti moa WANTOK.

• WANTOK Staf, 1974: (stat long lephan) Pius Pos, Brian Namiat, Pater Cashmere, Josephine Tupa, Pater Jurczykga, Crescentia Lementi, Francis Mana, Albert Singer.



PAS I KAM LONG EDITA

Sapos yu gat tok, yu raitim sotpela tasol. Sapos yu raitim longpela, bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela i prinim nem bilong yu tru, orait yu raitim wanpela narapela nem bilong yu.

KUKIM KAIKAI KISIM SAVE

Dia Edita.- Mi laik bekim pas bilong Silas P. Neldin bilong Anguganak long Lumi W.S.D.

Yes Silas, long namba tu tok bilong yu i olsem, man i stap long as ples bilong em na i mekim bisnis, bihain bai em i amamas. Em i tru.

Tasol long hap tok yu tok olsem, ol manki masta i wok kalabus bilong ol waitman. Dispela tok bilong yu i no tru.

Yu no ken tok bilas long ol waitman olsem. Mi ting wok kukim kaikai bilong ol waitman i gutpela long kisim save long mipela long kukim gutpela kaikai. Olsem yumi ken bihainim.

Yu ting kantri bilong mitupela Papua Nu Gini ol meri i save long kukim gutpela kaikai? Sori, mi ting i no gat tru ya.

Matthew Nakompo,
Warapu/Aitape.

BAIM MERI 400 DOLA

Dia Edita.- Liklik wari nau mi laik askim ol kaunsila bilong Maprik Sab Distrik.

Olsem wanem mi laik save long dispela prais bilong baim meri. Ol i save baim meri long 300 na 400 dola, em i gutpela o i nogut.

Bikos tingting bilong mi i olsem, long hap bilong yumi no gat wanpela bikpela bisnis i kamap long yumi.

Mi save yumi gat rais na kopi tasol. Sori ol kaunsila yupela i mas tingting na sotim prais bilong baim ol yangpela meri.

Olsem wanem long ting bilong yupela.

Petrus Maimao,
Bougainville.



KONTRAK LONG GOD

Dia Edita.- Mi wanpela wokman bilong G.T. Co. long Vanimo.

Mi laik bekim pas bilong Parapu Yat. Yes brata Parapu Yat, yu bin tok olsem. Yu wanpela kaunsil bilong ol katekis long hap bilong yu. Na yu amamas long ol gutpela wok ol i bin mekim.

Mi tu mi amamas long ol gutpela toktok bilong yu i stap long Wantok Niuspepa.

Orait brata Parapu, bel isi. Mi bel hevi long ritim toktok bilong yu i stap long Wantok Nius, olsem nau mi laik bekim.

Yu bin tok, ol pipel na Pater i no save long stretim pe bilong ol katekis.

Brata em i no tru. Yu save wok bilong ol katekis i no bilong kisim

bikpela pe. Ol katekis i ranim wok bilong God na ol i olsem ol Aposel bilong Jesus. Ol i no ken wari tumas long kisim bikpela pe.

Olgeta samting bilong graun i bilas na amamas bilong graun tasol.

Bikpela pe bilong ol bai God i givim ol long taim ol i pinisim kontrak bilong ol long dispela graun.

Amamas na laip bilong oltaim i stap wetim ol yet.

Brata sapos yu laik bekim gen orait, rait long Wantok.

Caspar Samala Megigi,
Goldore T. Com.

Vanimo, W.S.D.

ASKIM YU BILONG WE?

Dia Edita.- Mi lukim pasin i no stret antap long Hailans.

Planti taim mi lukim ol lapunman na yangpela man i no inap long kisim strongpela dring i dring na spak nogut.

Namba tu samting sapos ol man long Hailans sapos ol i dring spak bai ol i askim yu long rot na sapos yu tok yu bilong nambis bai ol i kirap na pait wantaim yu.

Ol brata, mi ting ol dispela lain i no mekim gutpela pasin.

Ol man bilong Hailans i save go wok long nambis na ol man bilong nambis i no save mekim olsem long ol.

Tru mi no save long sampela hap bilong nambis. Tasol mi lukim yet long ples bilong mi yet long Manus Ailan i no gat dispela pasin.

Sapos ol i pait bai ol i tok, kilim em, em i nambis man.

Mipela i kam i no

bilong pait, bilong wok na lainim ol gutpela pasin.

Yu husat i laik bekim pas bilong mi plis, rait tasol i go long Wantok Niuspepa.

Rhum Cocola,
Goroka.

HAISKUL GEN BEKIM SEM

Dia Edita.- Nau mi laik bekim pas bilong brata Joseph Joel Senna.

Yu bin tok olsem, ol haiskul manki i save hambak moa long gutpela save ol i gat na long ol gutpela bilas long skul.

Sapos yu wanpela bilong ol bai yu amamas long skul na gutpela save bilong yu o nogat?

Yu no ken tok piksa long mipela bikos kantri bilong mipela i laik kisim independens na tu olgeta wok long taun i nitim ol man i gat save tasol. Na yu yet laik stap olsem pasin bipo.

Mipela i no sem long wanem ol dispela save God i givim long mipela long yusim no long larim i stap.

Mipela i no save pret long holim graun, mipela save wok long skul long taim bilong wok didiman na long taim bilong holide tu.

Lucy Wamrabus,
Aitape Haiskul/W.S.D.



MAS LAIKIM DISPELA SENIS

Dia Edita.- Mi bekim pas bilong John Kuyep bilong Mugil long Mardang Distrik.

Mi tu mi gat bel i hevi long dispela tok brata John. Mi tu save olsem bipo ol pater i save mekim misa long tok latin. Olsem na harim singsing na pre i kamap nais tru.

Ol Pater na Bisop i save harim na i save bilip tru long mining bilong lotu.

Tasol mitupela i no gat, na em i no tok ples bilong mitupela. Em i tok ples bilong ol Itali insait long kantri Yurop.

Long yia 1964 bikpela kaunsil bilong lotu katolik i bung long Rom

na ol i senisim pasin bilong lotu insait hia long Papua Nu Gini. Na tu long sampela kantri long dispela graun.

Mi ting olsem lotu bilong tok pisin i nais tru, na ol pipel long hap bilong mi i amamas tru.

I gutpela ol peris kaunsil i mas ranim ol pipel i go long misa.

Yu yet i mas soim olsem yu laikim dispela senis.

Lotu pisin i tok ples tru bilong yumi Papua Nu Gini. Na tu em i bilong singsing na pre.

As tingting i olsem lukim, harim, mekim, bilip.

Raphael Maiep Waiwo,
Yumat/Nuku, W.S.D.

TUPELA HAP WANKAIN YET

Dia Edita.- Mi lukim wanpela pas i kam long Wantok Niuspepa long namba 7 de bilong mun Ogas long dispela yia, long wanpela man nem bilong em, Raymond Bom, long Bewani, Wes Sepik.

Em i rait na tok, ol nambisman i save tok bilas long ol hailansman. Em i tru. Olsem mi laik bekim pas bilong em tu. Mi yet mi save harim, na i gat bel hevi long dispela tok.

Ol nambisman i save tok olsem: Ol hailansman em ol busman. Na ol i no gat save o edukesen. Ol i save tok, ol i gat ol het bilong pik.

Tasol yupela ol nambisman yet i save tok nating. Yupela i no save olsem hap bilong yupela yet, ol planti busman na busmeri i stap yet long nau hia.

Olsem mi yet mi raun long hap bilong nambisman planti taim, na mi bin lukim planti ol i no save wok hat long mekim kantri bilong yumi i go



het gut tru tru yet.

Ol i save stap nating long bus na salim buai. Tasol dispela i no fit, o i no inap tru yet.

Sapos yu salim buai long ol arapela kantri olsem Australia, na Amerika, bai ol i baim o yu ting olsem wanem?

Orait plis ol nambisman. Yupela i mas tingting gut na toktok. Nogut hap bilong yupela yet i stap ol bus pipel yet na yupela toktok.

Nambisman plis ating no ken tok bilas orait.

Yumi i mas wok olsem wanpela kristen kantri.

Na yumi i mas i stap gut olsem ol brata tru.

Sapos yu husat i gat bel hevi long dispela, orait, rait tasol i go long Wantok Niuspepa na mi ken lukim o ritim.

Peter K. Komun,
C.I.B/Wewak.

TU MINIT TINGTING

Man i autim nem bilong mi long ai bilong ol manmeri, mi tu bai mi autim nem bilong dispela man long ai bilong Papa bilong mi long heven.

Matyu 10:32

Insait long ol wok bilong yumi ol Kristen planti taim i gat wanpela samting i no stret. Em olsem, yumi no strong oltaim long autim gutnius bilong Kraist. Tru tumas, sampela taim yumi no gat strongpela bilip, sampela taim yumi pret o sem nogut bai ol arapela man i kros o lap nogut long yumi.

Sapos yumi glasim gut ol wok bilong Kraist ating bai yumi painimautim i no gat wanpela taim Jisas i bin pret na i ranawe na lusim ol man nogut. Nogut tru! Em i no bin sem long autim ol tok bilong Papa bilong em.

Sampela taim ol birua i laik paitim em, tromoim ol ston long em, subim em i go daun long wanpela maunten.

Sampela taim ol hetman bilong Gavman na bilong lotu Juda i bin mekim sampela pasin i kranki tumas. Jisas i no bin mauspas, em i no bin givim baksait na hait long ol.

Nogut yumi tingting yumi bilipman tru na bihainim tru Jisas oltaim sapos yumi lukim sampela pasin i no stret o sampela bratasusa i karim wanpela hevi nogut na yumi larim em i stap.

Jisas yet i bin makim wanem kain trabel bai i kamap long yumi sapos yumi givim baksait long em o long wok bilong em. Jisas i pinisim liklik tok bilong em olsem: Man i givim baksait long mi long ai bilong ol manmeri, mi tu bai mi givim baksait long dispela man long ai bilong Papa bilong mi long heven. (Mat. 10:33)

Ating yumi ol Kristen i mas lukluk nabaut insait long ol viles na taun, na long kantri bilong yumi, na painimautim ol samting i no stret. Yumi mas wok long stretim ol dispela trabel na nau tasol yumi ken tok tru: Mi wanpela Kristen. Mi bihainim pasin bilong Kraist.

TRIKIM MERI MERI KROS

Dia Edita.- Nau mi laik autim liklik wari bilong mi long ol Wantok man.

Taim ol i go wokim wok long ol sampela taun na kisim pren long ol sampela man na tokim ol long nem bilong ol wantok meri.

Mi yet mi kisim moa pas i kam long ol man mi no save long ol. Ol i rait na tokim mi ol-

sem ol i kisim nem bilong mi long redio na niuspepa.

Ating yu lus tru na i stap. Tarangu nogut yu lusim strong bilong yu long rait. Ating yu wanpela kelaman.

Yu mas tingting pas-taim na rait, nogut pas bilong yu i paia nating tasol.

Yupela i mas sem tru long dispela. Nogut yu sem taim yu no kisim bekim long pas bilong yu. Gama Wamrabu,
Suain/W.S.D.

stori bilong tumbuna

Lapun Manmeri Painim Ston Tamiok

Taim bipo tru tupela lapun manmeri i go long bus long wanpela hap. Taim bipo tru tupela pela ston na paitim dis-pela longpela ston.

Tupela lapun hia i lukim wanpela kapul i long bus na kilim em. Ol i kolim dispela kapul, Malga.

Tupela i painim wanpela kapul tasol na klostu tudak pinis. Tupela i karim dispela kapul i kam aut long bus na tupela i painim ples nau long kukim kapul. Tupela i redim olgeta samting bilong kukim kapul pinis tasol i no gat mambu bilong tekewe bel bilong kapul. Tupela i wok long painim mambu tasol i no gat wanpela samting i stap klostu long ol.

Man i go lukluk nabaut long mambu na meri i sindaun i stap.

Lapun meri i sindaun i stap na em i pilim long as bilong em wanpela samting i sanap i stap.

Meri i sanap na lukim wanpela longpela ston. Meri nau i kisim nara-

pela ston na paitim dis-pela longpela ston.

Nau meri i lukim nais-pela sap i stap long hap ston i bruk. Em i kisim na traime katim sampela gras na ston i save katim tru ol gras.


Nau lapun man i kamap na meri i tokim em: Mi painim wanpela samting bilong tekewe bel bilong kapul pinis.

Nau tupela i amamas na rausim bel bilong kapul pinis mumuim na kaikai. Tupela i kisim hap ston i gat sap na karim i go long haus.

Tupela i tokim olgeta man long ples long ston i gat sap na ol man i go brukim dispela ston na wokim ston tamiok.

Ol man i kisim nem bilong tamiok: Kunjun. Em i nem bilong hap graun ol i painim ston tamiok.

Dispela ples bilong kisim ston tamiok i tambu tru long ol meri. Bilong wanem tewel bilong lapun meri i pain-



im ston tamiok i no laik ol arapela meri i lukim ston bilong tamiok.

Sapos ol meri i kam long ples bilong tamiok orait tewel bilong lapun meri i save haitim ston tamiok.

Taim ol man i no painim ston bilong tamiok bai ol i mas painim kapul Malga na mumuim bai tupela tumbuna bilong ston tamiok i ken

kaikai smel bilong kapul tupela i kaikai bipo na givim ston tamiok gen long ol man.

Ol i no ken kilim narapela kain kapul, ol i mas kilim Malga tasol. Nogut bai ol i no inap painim ston tamiok na ol tamiok i ken bruk kwik.

Karl Dimaua
CTC Pumakos
Enga Distrik.


KRISTEN EDUKESAN SEMINA



Long poto hia yu ken lukim 19 memba bilong wanpela kibung ol i bin mekim long Wewak. Ol i stap tisa long ol Tisa Koles. I gat 9 ol Tisa Koles bilong praimeri edukesen long Papua Nu Gini, 2 i bilong gavman, 1 bilong ol Luteran, 1 bilong Yunaitet Sios, 1 bilong Evangselikel Alaiens na 4 bilong Katolik Sios. Long tripela de ol dispela memba i bung bilong painimaut ol gutpela rot tru long helpim ol Papua Nu Gini tisa long kristen edukesen.

Ol i laik bung gen long tupela tupela yia na ol i ting ol kristen sios i gat rot bilong mekim sindaun bilong ol i kamap gutpela tru, sapos ol i bihainim skul bilong Kraist.

Ol tu i askim Mista Arnold KOIM, wanpela lokal man, long autim tok wanem help edukesen i bin givim long em.



• Mep I Soim Purari Riva.

Wari Long Purari Riva Skim

Gavman bilong PNG bai i wokim bikpela pawa stesin long Purari Riva insait long Galp Distrik.

Gavman bai i lusim \$700 milien long kirapim dispela wok na bai i kisim 6,000 wokman olgeta.

Dispela pawa stesin bai inap redi long yia 1984 na dispela taim bai i gat ol bikpela faktori bai i kirap long wokim ol kain ain na kapa bilong wokim ol kain masin.

Gavman i gat bikpela wari tru long ol rabis na pipia i kamap long ol dispela faktori na bai bagarapim sindaun bi-

long ol pipel.

Narapela wari bilong gavman, em long painim gutpela basis oples we ol sip i ken kam stap. Taim ol faktori i wokim ol ain na ol pipia bai i mekim wara na si i no go daun tumas bai ol sip i no inap long go.

Gavman i ting long wokimples o basis bilong ol sip long Hall's Sound na long Bluff klostu long Kerema. Tasol gavman i no laik ol bisnis i mas stap klostu long Port Moresby. Gavman i laik bai ol man long Rural Eria i mas kisim wok tu.

Ol Seving Na Lon Sosaiti I Go Het

Minista bilong ol Fainens, Julius Chan, i tok i gat 50 tausen memba i go insait long ol Seving na Lon Sosaiti na ol i bin putim \$4½ milien insait long ol dispela sosaiti.

Ol dispela sosaiti i wanpela samting bilong

Papua Nu Gini stret, em i tok.

Ol ekspetriet na gavman tu, i stap ausait long ol dispela wok. Ol pipel bilong PNG tasol ol i hetman bilong ol dispela wok, Mista Chan i tok na ol sosaiti i givim \$3 milien dinau.

Bikpela Pe Bilong Ol Kopra

Long wanpela yia tasol inap long mun Julai, PNG i bin winim \$5,325,000 i bin kamap long ol kopra ol i bin salim i go long ol arapela kantri, Minista bilong Agrikalsa, John Guise, i tok.

Insait long mun Julai tasol, kopra i bin winim \$718,000 na dispela i bin helpim ol rural eria i stap long nambis i go het gut.

NAMBAWAN KAIKAI BILONG OL FAMILI



Lukautim bai tripela kaikai hia i swit na i gat strong long en i stap oltaim long haus bilong yu.

HEINZ kompani i yusim gutpela samting tasol bilong wokim ol dispela kaikai. Sapos yu laik hariap redim strongpela kaikai - na tomato sauce i gutpela tru na swit moa - lukautim mak bilong HEINZ.



2167E

Lemeki i krosim Ol Filipino

Planti ol Filipino i stap nau long Papua Nu Gini, na sampela lokal pipel tu, i bin kalap nogut tru long sampela tokaut nogut bilong Mista Jacob Lemeki, Jeneral Seketeri bilong Pablik Sevis Asosiesen.

Mista Lemeki i bin tok bai PSA i wok long pasim ol pe bilong ol Filipino bai i no ken go antap inap long taim ol lokal wokman i stap insait long ol taun i kisim moa pe pastaim na ol samting bilong ol wok i kamap moa beta.

Mista Lemeki i tok ol dispela Filipino ol i no gutpela woka na ol i kam hia long painim rot i moa isi long go long Australia.

Minista bilong Leba na Nesenel Divilopmen, Mista Gavera Rea, i no bin laikim dispela tok Mista Lemeki i bin mekim na Minista i tok PNG i mas painim planti moa pipel yet ol i inap helpim dispela kantri i go het.

Tok bilong Mista Lemeki olsem ol Filipino i no mekim gutpela wok, dispela tok i rabis. Ol i gat gutpela trening na ol lokal pipel bilong PNG i no inap mekim ol dispela wok.

Sapos ol Filipino i laik go long Australia, rot bilong go i moa isi nau sapos ol i go stret long Australia na maski ol i kam long Papua Nu Gini pastaim.

Mista Rea i tok: husat man i laik lusim kantri bilong emnago wok long narapela kantri sapos em i no kisim moa pe long narapela kantri? Ol arapela kantri i mas grisim em long givim sampela pe moa bai em i laik lusim kantri na famili

Winim Prais Long Futbol



bilong em.

Bihain long ol dispela tok kros i bin kamap, Mista Sere Pitoi, siaman bilong Pablik Sevis Bot, i bin kibung wantaim Mista Lemeki na Mista Ruben Mendoza, Konsul bilong ol Filipino, na tripela ibin tok bai ol i wok wantaim bilong stretim ol kain kain wari bai dispela trabel i no ken kamap gen.

● Tripela taim long yia 1974 Saiden Michael Bai, kepten bilong PNGDF "A" gred Australian Ruls tim i bin winim biknem insait long kompetisen.

Hia em i kisim kap bilong em i kam long han bilong Michael Somare.

Saiden Bai i kisim tripela prais bilong PNGDF Klap, Papua Nesenel Futbol Asosiesen, na bilong Kap bilong SP Bruri.

STRONGIM BUN BILONG PIKININI



PENTA-VITE


yu ken baim long olgeta stua marasin

Kalsaral Festival Long Orokolo

Long mun Ogas wanpela Festival i bin kamap long OROKOLO insait long Galf Distrik long Papua.

Etpela skul bilong gavman na ol misin i bin bung long Hoe Praimeri Skul bilong mekim ol kain kain singsing, danis, na ol kalsaral aktiviti.

Mista Philip Aravure, Suprintenden bilong ol skul insait long Galf Distrik, i bin opim dispela Festival na em i bin tokim ol studen ol i no ken bihainim nating ol pasin bilong ol arapela kantri. Ol i mas hatwok long kamap nambawan sitisen tru bilong Papua Nu Gini stret na holim gut ol gutpela pasin na kalsa bilong ol tumbuna.



• Poto: Ol studen bilong Kavava Katolik Misin skul i redi long danis long Kalsaral Festival ol skul i bin mekim long Hoe Praimeri Skul long IHU insait long Galf Distrik long mun Ogas.

Wari Bilong PNG Beng

Mista Julius Chan, Minista bilong ol Fainens, i bin tok Beng bilong Papua Nu Gini i no inap wok gut sapos planti pipel i laik haitim ol mani insait long gaden na haus.


Mista Chan i tok olsem taim em i opim nupela haus bilong Beng long Mendi insait long Saten Hailans.

Beng i hatwok long yusim dispela mani ol pipel i putim em insait long Beng na ol winmani i go long helpim ol developmen bilong olgeta distrik, Mista Chan i tok.

Sapos ol pipel i haitim ol mani na wet nating bai Gavman i helpim ol, tru tumas bai i no gat developmen i ken kamap.

Beng i wok long givim planti dinau mani long ol liklik bisnisman tasol sapos ol i no wok long bekim ol dinau, Gavman i mas putim tambu.

Namba Wan Greduet Nes



• Metron P. Womchong bilong Nonga Bes Hospital long Rabaul, i wok long pasin wanpela bes long wanpela nes, Oram Maita bilong Nanganangan. Sista Maita i bin winim tru eksemnesen bilong em na em i kamap namba wan prektikal nes.

Wantok...

Yu laik go we?

Yu laik go mekim wanem?

Yu laik go long malolo?

Yu laik go lukim ples

na papamama?

Yu laik go long pilai?

Yu laik go long wanem

hap tru?

Wantok...

Yu no ken wari tumas long ol dispela askim. Talair I gat save tru long dispela samting. Larim Talair I ken helpim yu—na bai yumi amamas wantaim!


Sapos yu laik bosim balus bilong yu yet, I orait tu. Talair I gat kain kain balus yu ken chata. Em I chata bilong yu yet. Taim yu laik redi—balus bai I go. Yu yet ken makim taim bilong balus I ken I go.

Sapos yu laik go long balus long ron Talair I makim pinis, I orait tu—laik bilong yu!

I gat kain kain balus bilong baim-sampela

bilong karim faivpela man, sampela bilong karim nainpela na sampela bilong karim wanpela ten nain man.

Kam lukim mi pastaim na toksave. Em ol balus bilong Papua Niugini tru. Ol dispela balus I save go long olgeta ples bilong Papua Niugini, maski em I liklik ples o nogat. Sapos ples balus I stap—mi inap! opis bilong Talair I stap long olgeta taun bilong Papua Niugini.




TRAIM TALAIR—EM I LAIN BALUS BILONG YU NA PAPUA NIUGINI STRET

TALAIR 
PTY. LTD.

TSO102

STORI BILONG W

WANTOK




100 fótnaiti go pinis long wok bilong WANTOK NIUSPEPA. Ol piksa hia i laik soim yu stori bilong foapela yia bilong WANTOK.

1. Wanpela wanpela WANTOK NIUSPEPA i save go long han bilong sikis oetpela manmeri na olsem klostu 50,000 manmeri i save ritim WANTOK.

2. Ol dispela manmeri i statim wok bilong WANTOK. Lain i sindaun: *Pater Mihalic, M. Kovingre, A. Singer, T. Kanawi, na R. Goodey.* Lain i sanap: *J. Makera, F. Goodey, C. Lementina C. Cooke.*

3. Insait long haus bilong WANTOK ol i wok long wan wan de bilong bungim na mekim redi ol kain nius na stori.



WANTOK NIUSPEPA



4. Mis Crescentia Lementi i taipim ol nius na stori long ol liklik lain bai ol i painim isi long rit.

5. Mista Singer na Mista Mana i mekim redi tupe-la pes bilong namba 100 WANTOK NIUSPEPA.




6. Nau ol man bilong prininim i gat wok. Pastaim ol potoim ol stori na ol piksa na putim gut long wampela glas.


7. Bihain dispela masin i prininim ol Wantok. Long wan wan fotnait ol i save prininim 8000 WANTOK.

8. Taim ol i prininim pinis dispela masin i save bungim na putim wantaim ol pes bilong wan wan WANTOK.

9. Nau ol i gat wok bilong pasim ol WANTOK na salim ol i go long ol ples na ol skul.

10. Sapos yu bungim ol WANTOK ol i prininim pinis inap long nau bai faipela bikpela buk i kamap olsem yu lukim long dispela poto.





Wanpela ekspetriet ofisa, Mista Anthony Croft, na wanpela lokal ofisa, Mista Charles Maino, tupela bilong Gavman Lo Ofis, i bin go long wanpela kibung long Australia bilong harim ol kain tok bilong investim ol mani planti loman i tok long en.

Dispela kibung i bin kamap long Sydney na planti kantri bilong Asia na Amerika i bin salim ol pesman i kam long en.

Ol dispela loman i tok long ol wari i laik kamap insait long ol kantri bilong Asia na Saut Pasifik we ol ekspetriet i save bungim planti mani wantaim mani bilong ol lokal pipel bilong kirapim ol kain bisnis.

● Poto: Mista Croft (lephan) na Mista Maino (rait-han) i autim ol wari wantaim Mista John Connor, wanpela hetman long dispela kibung.

SAVEMAN I LUKLUK LONG RAIS INDASTRI

Minista bilong Agrikalsa na Stok, Dokta John Guise, i tok wanpela man bilong Yunaitet Nesen i saveman bilong rais i bin kam stap long PNG bilong painim ol kain we bilong helpim rais indastri i go het long PNG.

Man hia, Mista H. Ten Have bilong Holland i bin go lukluk raun long Morobe, Madang, Sepik, Isten Hailans na Mekeo eria em ol ples we ol i save groim rais. Bihain em bai go lukluk raun long ol arapela hap long Papua. Dokta Guise i tok long Mekeo eria tasol ol i bin groim 20-pela kain rais. Tasol i bin givim planti hevi na hatwok long ol pipel. Long Mekeo tasol i bin groim 140 tan rais long 1972 na rais indastri i go bikpela yet.

Profit I Kam Long Kopratif

Iji Kopratif Sosaiti long Kokoda insait long Noten Distrik i bin painim \$19,787 profit long yia i go pinis inap mun Epril.

Dispela winmani i kamap long ol kopi na kakau ol memba i bin salim. Sosaiti i bin baim 50 tan hevi kopi bilong ol pipel insait long Emo Wawarga Veli, em i namba wan taim ol pipel hia i bin wok long kisim mani.

Ol memba i bin vot orait long tilim \$9,790 i go long ol memba na \$9,787 i go insait long bisnis.

Minista bilong Edukesen, Dokta Taureka, i tok long kirapim nesanel sevis bilong olgeta yangpela manmeri i go long skul.

Em i tok gavman na ol misin i bin lusim bikpela mani long skul na ol yangpela manmeri i mas helpim kantri i go het.

Dokta Taureka i bin makim sampela lo olsem:

- Ol pikinini bai i go long skul taim ol i gat 6-pela yia tasol.

- Ol i mas skul long 8-pela yia long praimer skul.

- Gavman bai i makim husat bai i go long ol

bikpela skul.

- Taim ol i pinisim fom 4 bai ol i mas helpim kantri na wok long nesanel sevis long wanpela yia.

- Ol studen i go long ol bikpela skul bihain long haiskul bai ol i mas mekim 2-pela yia sevis long helpim kantri.

Em i tok nau Gavman i lusim \$55 milien long edukesen na taim dispela nupela senis i kamap bai gavman i inap lusim \$80 milien long ol skul. Em i tok Haus ov Asembli bai i orait long dispela senis long skul.

Bai Lida Bilong B.S.I.P. I Kam Hia

Namba Wan Minista, Mista Michael Somare, i bin askim Namba Wan Minista bilong ol Britis Solomon Ailan, Mista Solomon Mamaloni, long kam lukim PNG.

Mista Somare i bin salim tok amamas bilong PNG Gavman, taim Mista Mamaloni i kamap Namba Wan Minista. Mamaloni bai i kam long sampela taim yet.

Mipela inap wokim

Autim laik bilong yu tasol

OLKAIN SAMTING LONG KANDA

olkain sia
olkain tebol
olkain basket
blain pangal

Mipela ken salim long sip o balus. Rait tasol i go long:


CANE INDUSTRY PES-AITAPE, W.S.D.

Bisnis bilong ol lokal pipel stret

SALIM MANI I KAM

WANTAIM ODA

lukim ol prais hia



NUPELA DIVELOPMEN LONG SAINS NA TEKNOLOJI




• Antap: Insait long Amerika ol dokta i bin putim wanpela liklik bateri masin insait long bros bilong wanpela liklik meri bihain long 5-pela de taim mama i karim em, bikos lewa bilong pikinini i no wok strong.

Ol dokta i bin lukim pikinini long eksre masin taim em i stap long bel bilong mama. Ol i ting nau bai em i stap gut.

• Daunbilo: Long 19 Desemba 1973, ol astronaut bilong Amerika i bin ron long skai insait long skailab, em i wanpela satelait. Ol i kisim poto bilong san i soim bikpela paia i sutim han i go antap 400 tausen mail longwe.

Dispela kain pairap i save paulim ol redio brotkas na olsem sampela taim bai yu no inap harim gut ol brotkas.



• Antap: Dispela em i wanpela kain kamera ol i bin wokim long Amerika. Em i liklik tru olsem wanmak olsem ai bilong man.



Ol inap long putim em insait long bel bilong man, insait long ol kain kain masin na ol arapela samting bilong kisim poto taim man i hat tru long painimautim wanem trabel i stap insait long ol samting.

• Daunbilo: Wanpela satelait bilong Amerika i save ron long skai na i wok oltaim long kisim poto bilong graun o plenet bilong yumi i kamap olsem mun.


Lukim long poto hia, ol klaut i kamap waitpela na ol i makim ol ples we i gat bikwin na ren. Taim ol sains i lukim dispela, ol i toksave long ol pipel.



• Antap: Nevi bilong Amerika i bin wokim wanpela sip i gat 100 tan hevi na em i save spit inap 100 mail insait long wanpela aua. Em i save ron long win antap long wara. Nau ol i traim wokim nara-pela i gat 2,000 tan hevi.




I STRONG, I STAP LONGTAIM, I KOSTIM LIKLIK



Sapos yu wokim haus, orait, yu wokim long gutpela samting. Nogut em i pundaun bihain long sampela mun o yia. Kisim faibro i gat nem Hardie, na bai yu win.

Faibro Hardie i strong, i save stap longtaim, i no kostim planti. Em hia sampela pasin bilong yusim.

TILUX- FAIBRO BILONG OL BANIS



Dispela faibro em i bilong haus kuk o rum waswas, bilong ol ples wara i save wasim planti taim.

Em i nais tru na i gat 8-pela kala.

HARDIFLEX- FAIBRO BILONG WOKIM HAUS



Faibro hia em i strong, i bilong ol banis insait na ausait. Yu ken penim o larim i stap nating. Ren na san i no ken bagarapim.

Em i no ken sting o krungut o paia.

VERSILUX- FAIBRO BILONG BILASIM HAUS



Em i bilong bilasim insait long haus na mekim ol banis i no ken paia. Em i gat kain kain kala. Tasol yu ken penim tu long laik bilong yu. Em i strong, i nais, i bilong longtaim.

Yu Ken Baim Long Burns Philp and Bowman's

Hardie's
BUILDING PRODUCTS

Luteran Yut Kibung

Long Lae

Moa long 300 yangpela memba bilong Luteran Sios i bin mekim wanpela kibung inap long 6-pela de long Bunmayong Haiskul long mun i go pinis.

Pasto Peyandi Lepi, Asisten Yut Dairekta, i bin tok ol i autim ol kain kain wari bilong ol i laik kamap long taim bilong selp gavman na independens bilong Papua Nu Gini.

Ol dispela yangpela manmeri i bin bung i kam long planti skul, ples bilong wok, na ol viles na taun. Ol i bin wanmaus long bihainim Et Poin Plen bilong Gavman na long painim ol kain kain wok bilong mekim ol viles yet i go het.

Olgeta atoriti bilong Gavman i kam long han bilong God na ol yut i gat wok long bihainim ol lida bilong Gavman na bilong Sios.

Ol yangpela manmeri i bin stap long dispela kibung i bin tok strong olsem PNG i mas painim planti moa nupela lida i no inap stil o giaman tasol ol i wok tru long helpim kantri i go het.

Kros Long Maket

Dokta John Guise, Minista bilong Agrikalsa, i bin sakim tok bilong Kaunsila Lahui Tau taim Kaunsila Tau i tok Dipatmen ov Agrikalsa i pulim ol mani bilong ol pipel i salim kaikai i go long maket bilong Gavman long Port Moresby.

Gavman na ol pipel i laikim ol prais i go daun, Dokta Guise i tok, na ol ofisa bilong Agrikalsa Dipatmen i bin skelim gut ol prais bai ol fama i gat gutpela profit o winmani.

Kaunsila Tau i tok win nating na i laik paulim ol wok bilong helpim ol pipel, Guise i tok.

Timba Industri I Bikpela Moa

Ol kampani bai i wok-
im tripela bikpela tim-
ba mil faktori long
Manus, Popondetta na long
Milne Bay Distrik.

Long ol dispela timba
mil faktori bai ol i
wokim ol kain plaiwut,
ol pepa na katim timba.

Wanpela kampani bilong
Japan bai i kirapim tim-
ba mil long Manus. Kam-
pani bilong Honkong bai
i kirapim timba mil
long \$5 milien insait
long Milne Bay Distrik.

Narapela bikpela tim-
ba mil bai i kirap long

Popondetta. Ol i kolim
Pacific Forest Product
kampani bilong Austra-
lia i laik wokim long
\$7.5 milien.

Ol tripela kampani
hia bai i kisim samting
olsem 2,000 wokman.

Minista bilong Nesrel
Risoses, Mista Jephcott,
i tok PNG pipel i ken
baim sea o kamap memba
long ol dispela kampani
na kisim 26% winmani.

Em i tok ol papa bi-
long ol graun tu bai i
kisim hap winmani i kam
long ol kampani.



● *Poto: Gabon, wanpela kantri insait long Afrika, i winim bikpela mani long ol timba. PNG tu inap?*

Bikpela Profit Long B.C.L.

Ol winmani i kamap long Bougainville Kopa insait
long 6-pela mun inap long 30 Jun i bin moa long
\$118½ milien. Long yia bipo, long 6-pela mun inap
30 Jun, profit i bin stap long \$52 milien tasol.

Long taim bilong nupela ripot, ol Dairekta i
tok prais bilong ol kopa i antap moa tasol long
mun Julai inap nau ol prais i laik go daun gen.






Ol man i gat sea bai i kisim winmani i stap
20% long 1 Novemba. Bai Gavman i kisim \$13 milien,

CRA (emb bikpela kampani i mama bilong Bougainville
Kopa) bai i kisim \$12.2 milien, sampela arapela
man i gat sea bai i kisim \$6 milien na tu kampani
i mas bekim \$25.7 milien dinau mani i go beko long
ol beng.

RAUSIM PEN



**Nambawan marasin
bilong olgeta pen.**





Long mun Ogas Mista Somare wantaim sampela hetman bilong Gavman i bin opim Gogodala Kalsa Senta long BALIMO insait long Westen Distrik. Hia ol pipel i soim ol wok na bilas bilong tumbuna.

● Daunbilo: Mista Somare i kisim wanpela stik ol hetman i save holim.

● Antap: Ol kanu bilong pait i samting olsem 80 fit longpela na ol i holim 70 stiaman i lain long kisim prais.

● Raithan: Wanpela tumbuan i stap insait long nupela Kalsa Senta.



● Antap: Ol resis i pinis, nau ol kanu i kam sua long Lukim Mista Somare i opim Gogodala Kalsa Senta.



WANTOK

JANUERI - JUN, 1974

Ol WANTOK niuspepa bilong dispela yia, stat long mun Janueri inap long mun Jun, i stap nau insait long wanpela buk.

* * *

Dispela WANTOK buk bai i kamap TUPELA TAIM long wanpela wanpela yia long mun Ogas na long mun Februeri.

* * *

Dispela WANTOK buk i nambawan samting bilong

- * helpim ol sosel stadi klas long skul
- * helpim ol adalt edukesen klas i go het
- * helpim ol i laik skul long TOK PISIN
- * putim insait long ol skul laibreri

* * *

I no gat planti WANTOK buk. Sapos yu laik kisim wanpela, hariap makim tiket i stap hia na putim mani wantaim na salim i kam.

WANTOK PUBLICATIONS, Inc.
P.O. Box 396,
Wewak. P.N.G.


Mi laik baim WANTOK buk.

Nem bilong mi:


Adres bilong mi:

.....

Prais bilong wanpela buk:
\$2.00 (+ 20¢ bilong baim stem)
\$2.00 (+ 45¢ bai em i kam long balus)




Poto: balus bilong Amerika i pait wantaim ol bot bilong Japan long hap bilong Wewak. Ol Japan i lusim planti bot tru na ol i no inap long win.



Dispela stori i tru. Em i go bek long taim bilong namba tu woa. Ritim gut na sapos yu save sampela samting i kamap long hap bilong yu long taim bilong namba tu woa, orait, yu salim pas i kam long WANTOK na helpim mipela long bungim ol dispela stori.

AMI BILONG JAPAN I KAM LONG WEWAK



Long Desemba 18, 1942 foapela bot bilong ami bilong Japan i kam pinis long Wewak. Klostu tu tausen soldia wantaim planti ol masin na samting bilong pait i lusim ol bot na ol i sindaun long nambis bilong Wewak long hap bilong Wirui. Long nait yet ol i painim tupela misinari, long moning taim ol painim ol arapela misinari na askim ol long planti ol samting. Long misin hil ol ami bilong Japan i rausim ol skulmanki pastaim, bihain ol i rausim ol pater, bruder na sista na ol yet i kisim haus bilong ol.

Long taim bilong Krismas ol sista i bilasim wanpela krismas tri na mekim liklik musik long wanpela masin ol i kolim rekot pilaia, tasol ol Japan i tambuim ol bikos ol i pret dispela rekot pilaia em wanpela redio bilong salim tok i go long planti ol ples.

Kwiktaim ol Japan i kisim save long tupela

arapela misin stesin klostu long Wewak, wanpela i stap king Kairiru wantaim bisop Loerks, 4 pater, 7 bruder na 9 sista, arapela i stap long Boikin na i gat 1 pater, 2 bruder na 5 sista.

Long pestode bilong Krismas ol Japan i kisim bisop wantaim ol pater na bruder i go long Wewak long namba wan ofisabilong ol ami. Ol Japan i ting ol misinari i wok wantaim ol birua, ol i gat redio bilong salim tok na ol sem planti taim ol balus bilong Amerika i bagarapim planti bot bilong Japan. Em i no tru ol misinari i salim tok, nogat. Long maunten Horep long hap bilong Boikin wanpela soldia bilong Australia i hait. Em yet i lukluk gut nabaut na sapos ol bot bilong Japan i kam long Wewak em i salim tok long redio bilong em na ol balus i kam bilong bagarapim ol ami bot bilong Japan. Wanpela balus bilong Amerika tu

i pundaun. Ol etpela soldia i pundaun long solwara na ol i stap long wanpela gumi bot long tupela de inap long win i bringim ol long Voceo ailan. Katekis Jon Mom i tok long ol dispela soldia em i save wanpela pater bilong Amerika i stap long Kairiru. Nem bilong Pater MANION. Mista McMurria, pailot bilong balus i pundaun, i raitim liklik pas, putim em insait long wanpela mambu na medikal asisten Mot wantaim tupela man i kisim kanu na i go long Kairiru. Ol i lusim Voceo long taim san i go daun na i wok hat tru bai long moning taim tru ol i ken kam long Kairiru Mushu pastaim na ol i harim ol Japan i stap pinis long Kairiru, ol sem ol wet inap long san i go daun bai ol Japan i no ken lukim ol. Pater Manion i kisim pas, pulimapim wanpela kopra beg long marasin na ol kain samting na salim i go long Voceo.

Nau wanpela bikpela moa kanu wantaim planti moa man i lusim Kairiru na i kam long Voceo stret.

Ol Japan soldia i no gut long ol misinari. Wanpela taim pater Reif na pater May i kam long Wewak. Ol Japan soldia i no givim tupela ples long ol misin haus, nogat ol i salim tupela long painim ples bilong slip long sismen bilong wanpela smolhaus.

Taim bomb bilong sabmarin i bagarapim bot bilong Japan, bisop i tok "Sabmarin, sabmarin..." Nau ol Japan i kros nogut long bisop na i tok long em yet i givim mak long ol birua bilong bagarapim dispela bot.

Long 25 de bilong Februeri 1943 ol i askim pater William Jakob na bruder Emanuel long Gut Katolik Misin long i go long namba wan ofisa bilong ol. Pater William na bruder Emanuel i putim nupela trausis na gutpela siot na ol i go. Tasol ol soldia pulim tupela long bus na kilim

tupela indai.